

ZAKON

**O IZMJENAMA I DOPUNAMA KRIVIČNOG ZAKONA BOSNE I
HERCEGOVINE**

Član 1.

U Krivičnom zakonu Bosne i Hercegovine ("Službeni glasnik BiH", br. 37/03, 61/04, 30/05 i 53/06) u članu 1. stav (30) briše se.

Dosadašnji stavovi (31) i (32) postaju stavovi (30) i (31).

Član 2.

U članu 193 a) iza stava (1) dodaju se novi stavovi (2) i (3) koji glase:

"(2) Ko na bilo koji način upotrijebi hemijsko ili biološko oružje ili borbena sredstva, zabranjena pravilima međunarodnog prava, kaznit će se kaznom zatvora od pet godina ili kaznom dugotrajnog zatvora.

(3) Ko iskoristi sredstva za kontrolu nereda kao metodu ratovanja, kaznit će se kaznom zatvora od jedne do tri godine."

U ranijem stavu (3) istog člana slovo "i" između stava (1) i (2) briše se i dodaju: "i (3)"

Dosadašnji stavovi (2) i (3) i (4) postaju stavovi (4) i (5) i (6).

Član 3.

Iza člana 193. a) dodaju se novi članovi 193. b) i 193. c) koji glase:

"Član 193. b)

(Neovlašteni promet hemikalijama)

(1) Ko uvozi, izvozi, prevozi ili posreduje u prodaji ili prometu hemikalija bez dozvole propisane Zakonom o implementaciji Konvencije o zabrani razvijanja, proizvodnje, gomilanja i korištenja hemijskog oružja i o njegovom uništavanju (u daljnjem tekstu: Zakon o implementaciji CNJC) ili ko daje neistinite podatke u postupku izdavanja dozvole u skladu sa Zakonom o implementaciji CNJC, kaznit će se kaznom zatvora od tri do deset godina.

(2) Ko organizira grupu ljudi s ciljem činjena djela iz stava (1) ovog člana, kaznit će se kaznom zatvora od pet godina ili kaznom dugotrajnog zatvora.

(3) Ko iz nehata učini djelo iz stava (1) ovog člana, kaznit će se kaznom zatvora od šest mjeseci do pet godina."

"Član 193. c)

(Aktivnosti protivne režimima propisanim Zakonom o implementaciji CNJC)

(1) Ko preduzme aktivnosti protivne režimima za aktivnosti koje uključuju hemikalije s Liste 1 i Liste 2 Zakona o implementaciji CNJC, kaznit će se kaznom zatvora od jedne do pet godina.

(2) Ko preduzme aktivnosti protivne režimima za aktivnosti koje uključuju hemikalije s Liste 3 Zakona o implementaciji CNJC, kaznit će se kaznom zatvora od jedne do tri godine.

(3) Ko skladišti hemikalije bez dozvole propisane Zakonom o implementaciji CNJC, kaznit će se kaznom zatvora od šest mjeseci do tri godine."

Član 4.

U XV. poglavlju KRIVIČNA DJELA PROTIV SLOBODE I PRAVA ČOVJEKA I GRAĐANINA, iza člana 155. dodaje se novi član 155. a), koji glasi:

"Član 155. a)

(Davanje lažnih izjava tokom postupka imenovanja)

(1) Ko s ciljem obmanjivanja ili održavanja u obmani organa nadležnog za imenovanje ili Predstavničkog doma Parlamentarne skupštine Bosne i Hercegovine ili njihovog nadležnog organa o tome da li ispunjava uvjete za imenovanje na položaj predsjedavajućeg, ministra ili zamjenika ministra Vijeća ministara Bosne i Hercegovine, odnosno za potvrdu na te položaje, tokom postupka imenovanja i potvrde na te položaje koji se provodi na osnovu zakona, da lažnu izjavu, u pisanom ili usmenom obliku, o podatku ili informaciji potrebnoj za utvrđivanje da li ispunjava uvjete, a koju je obavezan po zakonu ili drugom propisu pružiti, te time prikrije ili izmijeni činjenice značajne za odluku o imenovanju ili potvrdi, kaznit će se novčanom kaznom ili kaznom zatvora do tri godine.

(2) Ako počinitelj dobrovoljno opozove svoju lažnu izjavu prije nego što je donesena konačna odluka o potvrđivanju, kaznit će se novčanom kaznom ili kaznom zatvora do šest mjeseci, a može biti i oslobođen od kazne."

Član 5.

Ovaj Zakon stupa na snagu osmog dana od dana objavljivanja u "Službenom glasniku BiH".